

Erich Bolinius  
[www.erichbolinius.de](http://www.erichbolinius.de)

**(Bericht über den BSV Kickers Emden**

Sendung „Flutlicht“ auf Radio Ostfriesland

**Donnerstag, 23.1.2014 18.00 Uhr** auf 94.0 bzw. 87,7)

Moin, leev Toehörers,  
dat eerst Punktspöl van Kickers Emden in disse Saison steiht noch ut. Nadem Kickers Emden in verskeden Hallentourniere alltied as Winner van d' Platz gahn sünd, leep dat lesd Wekenenn in Timmel neet goed. Wall wurr dat eerst Spöl tegen Timmel hoog wunnen, man dann leep dat neet mehr. Tegen Pesem (Pewsum) spölte man 2:2 un tegen Germania Leer wunn man knapp mit 1:0. Aber tegen de Bezirksligist Grootfehn (Großefehn) verlor man mit 0:2. Dormit skeite man al in de Vörrunn ut dat Turnier ut. Pesem wumm um Platz 3 tegen de van Uwe Groothuis trainerte Mannskupp van TuS Middels. In de Finalspöl stunnen sük Eintracht Nordhorn un Grootfehn tegenover. Dat Spöl wurr in Elfmetersketen enskeddt. Nordhorn harr hier mehr Glück un wunn dormit de Winter-Cup van de SuS Timmel.

Dat de TuS Pesem, bevör de Saison neet toe Enn is, nu all bekannt gifft, dat Trainier Stephan Prause an Enn van de Saison entlaten word, kann ik neet verstahn. Mit Yasin Turan, de ja bi Kickers Emden vör eenige Tied entlaten worden is, kriggt Pesem van dann off 'n neei Trainer. Ik löv neet, dat Stephan Prause de hele Saison noch bi Pesem unner Vertrag blifft, steiht Pesem doch up 'n Ofstiegsplatz - un dann versöken de meeste Vereenen, um noch wat toe redden, de Trainier toe entlaten.

Wall sük upstünns ja bi Kickers Emden neet sovöl deit, much ik van mien Vietnamreis, de ik mit mien Ü60-Foetballmannskupp van SV Petkum maakt hebb, un güstern na 14 Daag weer in Emden ankommen bün, vertellen.

Uns Reisföhrer dee uns hartelk begrüten un see, dat he sük freien dee, 'n Mannskupp van Kickers Emden toe begrüten. Dor hebben wi düchtig laggt. He harr sük in 't Internet over de Emder Foetball schlau maakt un meente, dat dat blot 'n Mannskupp van Kickers Emden wesen kunn, de na Vietnam kwamm, um dor toe spölen.

Wi sullten ansük 2 x spölen, man wi hebben blot eenmal in Hanoi spölt un mit 3:5 tegen Mannskupp, de ruugweg in Dörschnitt 25 Jahr junger wass, verloren. Dat tweed Spöl in Saigon ist utfallen, wall Bült ollere Spölers wegen dat Neejahrsfest, ia 'n heel hoog Fest dor un dat finndt disse Wekenenn statt, neet dor wassen. Van de hoogste Vereen in Saigon sünd wi aber in de „Fußball-Schulungszentrum“ heel goed upnomen worden. De Vereen söcht ut de verskedenen Joegdmannskuppen in Vietnam de best Spölers rut un deit de fördern. Mit Arsenal London bestieht 'n Verdrag. De besten stüren se dann na London in 'n Foetballinternat. Nat de Utbilden komen de jung Spölers dann na Vietnam toerügg. Man harr best Erfahren dormit maakt, vertellte man uns. Villicht is dat ja ok – in lüttjere Rahmen – maal 'n Weg, de Kickers Emden ok bestrieten kunn.

So, tolesd as immer, noch kört Foetballwitz of Sprök.

„Wi wullen in Bremen keen Tegentor kasseeren. Dat hett ok bit toe de Tegentor heel goed klappt,“ so de ehemalige Nationalspöler Thomas Häßler

So, leev Toehörers van Radio Oostfreesland,  
ik hoop, Joe hett dat Plattdüütsk gefallen, denn mien Motto heet ja alltied,  
plattdüütsk dürt - nettso as Kickers Emden – neet unnergahn.  
Bit anner Maal

Joe  
Erich Bolinius ut Emden-Petjem.

.